

中華文史叢書之九十三
清・光緒二十一年刊本影印
王有立主編

庚辛泣杭錄 (一)

丁氏纂輯

華文書局股份有限公司印行




中華文史叢書之九十三
清·光緒二十一年刊本影印
王有立主編

庚辛泣杭錄 (二)

丁氏纂輯

華文書局股份有限公司印行



庚辛泣杭錄

光緒二十一年冬月

仁和蔡玉瀛題

錢塘丁氏刊行

庚辛泣杭錄卷一

欽定剿平粵匪方略

咸豐十年庚申三月初一日

上命軍機大臣傳諭羅遵殿曰逆賊竄陷廣德窺伺杭湖並已闌入安吉情形實屬喫重和春已令鄭魁士統兵赴浙並派曾秉忠等統帶水陸官兵三千名由蘇常徑赴湖州合之何桂清所派兵勇爲數已屬不少周天孚又帶兵於四安獲勝著羅遵殿卽將前項援軍飛提前進速將安吉攻復賊衆尙未深入自不難於擊退李定太此次猝然遇賊以致受傷退守湖

州侯江南兵到仍令會同出勦不可株守一隅黃灣
南陵防兵一經撤動則蕪湖青繁賊衆必與廣德聯
爲一氣羅遵殿切不可輕率調動致有疏虞曾國藩
遠在皖北未能赴浙卽江西之兵亦恐緩不濟急已
諭令張芾酌量抽撥協濟矣

三月初五日瑞昌羅遵殿來存奏言臣等探知
武康縣城已有賊蹤該縣距省城祇百里內外
一日可到其時浙省兵勇均分防湖州孝豐餘
杭等處正擬調回扼紮而離北新關三十里之
安溪地方突有騎馬之賊焚掠而來臣來存趕

赴武林門攔截臣瑞昌馳赴錢唐門扼堵臣羅
遵殿卽將兵勇分派各門防守布置未定該逆
已大股麇至闖武林門當將各城門封閉爲登
陴守禦之計賊已在錢唐門外之棋盤山築壘
二十一二十二等日又在正陽門外之萬松等
嶺徧插旗幟窺伺城中臣等晝夜巡防不敢稍
懈幸杭城百姓敵愾同仇協同官兵守禦臬司
段光清甯紹台道仲孫懋遊擊胡應元各帶兵
勇回省兵力稍厚節據和春等咨稱續派副將
向奎總兵張玉良各帶兵勇二千援浙李定太

亦派參將周天孚等管帶兵勇二千餘名總兵
曾秉忠分撥長龍船二十隻及知縣馮佩珩礮
船十六隻駛赴省河援剿其總兵米興朝所統
三千六百人由徽州前來聞已行抵江口臣等
惟有固守待援俟大兵雲集方能合力痛剿乍
浦距省尙近惟有仰求

恩飭下乍浦副都統錫齡阿再派官兵四百名連前
調四百名湊足八百名卽由該副都統管帶來
省以資剿守二十三日接該副都統函稱帶兵
協領祥瑞於十九日行抵塘棲詢知省垣北新

關已有匪徒搶掠勢難前進擬折回嘉興駐守
查該協領既知省城緊急更當催兵救援乃竟
擁眾折回實屬畏葸不職擬請將該協領先行
摘去頂戴飭令仍統全隊來省隨同剿賊以贖
前愆

同日

上命軍機大臣傳諭和春張國樑何桂清瑞昌羅遵殿
來存曰皖南之賊由廣德徑竄四安逼近浙境業經
和春等派兵赴援乃該逆竟由武康直撲浙省羅遵
殿等登陣守禦布置蒼黃徒爲守城之計並未派兵

迎擊實屬無能之至向奎等帶兵援浙何以任令該
逆逼近浙省恐各軍未能確探賊蹤以致節節落後
著和春張國樞何桂清迅速催令前進以解省城之
圍瑞昌等現在固守待援務即激勵兵勇妥爲防範
米興朝統兵三千六百名已抵江口即可迎提協剿
一俟江南援兵雲集即應內外夾擊痛殲醜類毋得
株守省垣致成坐困之勢瑞昌等請飭錫齡阿再派
官兵四百名來省助剿連前調之兵共八百名即著
瑞昌飛飭錫齡阿管帶赴省協領祥瑞帶兵行抵塘
棲既知省城危急竟敢折回嘉興實屬畏葸著先行

摘去頂戴仍令帶兵赴省隨同剿賊如再不知奮勉
卽著從嚴參辦

三月初六日何桂清徐有壬奏言逆匪撲犯湖州
攻陷武康逼近杭州省城二月十九二十等
日在武林門外放火撲城適江南派援之副將
向奎所帶二千人已於二十二日早行過吳江
縣之平望鎮當飭由嘉興一路兼程前赴杭州
總兵李定太由湖州抽調周天受派援浙江之
參將周天孚等軍二千八百餘人江南派援之
曾秉忠所部長龍船二十隻及知縣馮佩珩所

帶礮船十六隻於二十一日由湖州拔隊馳援
杭州總兵米興朝統帶兵勇三千九百名於十
六日由徽州拔隊從於潛一路進發屆計亦可
到杭尙有獨松關防堵之甯紹台道仲孫懋一
軍現亦無事必已折回杭州並有兩次截留江
南大營招募新勇三千四百名合計兵力不爲
不厚乃二十五日探知浙江撫臣羅遵殿將援
湖水陸各軍全數調赴杭州臣等查逆匪大股
屯聚湖州府屬僅分一股撲犯杭州顯係湖州
援兵漸集故作此狡獪伎倆使我分兵援救杭

州彼得逞志於湖州也羅遵殿未識賊情致墮其術幸總兵張玉良於二十四日早馳抵蘇州聞知情形將羅熙賢一軍調回湖州並飭曾秉忠將畱防湖州之長龍船不准再行擅動而羅熙賢能否追回長龍船已未赴杭均不可知浙江軍務本應聽羅遵殿調度惟該撫主守不主戰且守近不守遠李定太雖曾幫辦浙江軍務而自梅溪失挫威望頓失亦不足以資統率可否請

旨飭下和春兼辦浙江軍務而以張玉良總統援浙諸

軍所有江浙徽甯官軍悉聽調度庶事權歸一
不致貽誤大局

同日

上命軍機大臣傳諭羅遵殿曰皖南逆匪擾及浙境直
撲省垣該撫將援湖水陸各軍全數調赴杭城不識
逆匪分我兵力墮其術中已屬調度乖方而且主守
不主戰守近不守遠株守省垣致成坐困之勢現在
已命和春兼辦浙江軍務並命張玉良總統援浙諸
軍所有江浙徽甯官軍悉聽調度羅遵殿卽飭令聽
候張玉良調遣勿庸歸李定太總統該撫亦不得率

行更調致失機宜此時惟當激勵將士固守省城一俟援師雲集內外夾擊以解城圍

三月十二日和春奏言接浙江臬司段光清稟稱逆匪在省城西南隅清波門外暗掘地道埋伏火礮於二十七日將城轟塌三十餘丈該逆卽從此處蠡擁入城惟見滿營官兵接仗殺賊其餘兵勇紛紛潰散該司與副將王邦慶招集潰勇退保海甯嘉興一帶一面趕招艇船堵截錢塘江口以保甯紹門戶各等語現在何桂清奏派總兵張玉良總統諸軍恐未能深悉地勢

據江蘇藩司王有齡稟稱情願自帶一旅以圖補救足徵忠義奮發臣擬咨商督臣先令王有齡與張玉良會辦俾臣等得以專心督飭將士迅拔金陵

同日何桂清徐有壬奏言查杭城倚山面江形勢險峻約計在防兵勇尙可守禦何以未及旬日堅城遽陷臣與藩司王有齡反覆籌商湖州已由張玉良分派兵勇擇要堵禦嘉興府城亦准李定太來咨卽日馳往扼守張玉良一軍已由湖拔隊赴杭熊天喜所帶勁旅三千前隊已

抵蘇州臣等飭催倍道馳往察看緩急分別畱
防進紮一面咨請和春速派勇敢大員多帶精
兵星馳會勦現又由署蘇松太道吳煦招募上
海礮船四十隻駛赴嘉興一帶迎頭進擊張芾
所派援浙之米興朝一軍聞亦不日抵杭並卽
咨催迅從於潛一路抄出賊前會同兜擊其自
浙入蘇要道平望鎮有署臬司蔡映斗統帶礮
船防守上游新市烏鎮及太湖一帶現亦分派
員弁扼堵並勸辦團練協力巡防以期周密

同日